

Ing. Vi Frank: UN TRAYECTORIA FRUCTIFERO DI 38 AÑA NA KADASTER!



ORANJESTAD (AAN) -- Ing. Vi Frank a bira e prome director di Kadaster tempo cu Aruba a haya su Status Aparte. Pero en total e tin 38 aña trahando na dicho departamento. Apesar cu el a baha cu pension su pasion pa e trabao aki ta asina grandi cu el a bolbe bin traha como lider di proyectonan, y semper cu e mesun motivacion y deseo di pasa su experiencia over pa esnan mas hoben. Den e dianan aki nos por lesa den nos matutino un breve historia di Kadaster, relata pa Ing. Frank, pero no menos interesante ta su propio experiencia y di con el a scoge pa studia y traha riba e tereno di Kadaster. DIARIO a acerca e cabayero Vi Frank pa un entrevista, di

cual awe nos tin e prome parti. Prome cu Status Aparte di Aruba Ing. Vi Frank tabata hefe interino di e dienst di Antiyas di cual Aruba a forma parti. Na aña 1980 e hefe di e departamento a bay cu pension y Ing. Frank a worde encarga cu e kantor di 1980 pa 1985, cu el a worde nombra como director. "Cu status aparte a bin un fusion entre e parti cu ta haci e trabao di midimento di D.O.W y Kadaster. D.O.W tabata un dienst di Aruba mientras cu Kadaster tabata un dienst di Antiyas Neerlandes. Pa no bin cu dos departamento cu haci e mesun trabao a fusiona e dos dienstnan aki hunto y e ora ey nan a cambia e nomber pa

'Dienst Landmeetkunde en Vastgoedregistratie' bao di cual e dienst di Kadaster ta cay. Desde 1 di Januari di 1986 mi a worde nombra como director di e dienst", Ing. Frank a comenta.

UN BUNITA PROFESION

Ing. Frank a studia na Utrecht e carera di GEODECIA cu tabata dura 4 aña pero el a haci'e den tres.

"Mi a logra di haci e curso den tres aña como cu tabata tin un diploma di un curso di Kadaster cu mi a haci na Aruba. Mi a pasa e curso ey na aña 1955 y na 1957 mi a bay studia pa un HTS na Hulanda, unda mi a obtene un titulo equivalente na un Bachelor Degree di Merca. Na aña 1960 mi a bin traha bek na Aruba".

Ing. Frank a conta cu el a cay den e bunita profesion aki na un manera masha insolito. Di con?

"Mi a caba MULO-B na 1948 cual tabata bay un tiki mas mas halto den wiskunde y fisica cu e diploma-A di MULO.

Un ex-compañero di clas di mi cu a caba su Diploma-A so a cuminsa traha na Kadaster pero e no por a sigui e curso debi cu e no tabata tin su B-Diploma anto pa haye el a haci dos aña extra. Nan tabata di cuminsa un curso na Kadaster pero gobierno tabata exige cu mester tin 7 persona minimo pa cuminsa e curso, y e tabata sa cu mi tin B-Diploma (mi tabata traha na Lago e tempo ey) el a yama mi y puntra mi si mi kier haci e curso. Mi a inscribi cu e idea di yuda pa e curso haya e 7 hendenan, pero ora mi a conoce e profesion el a fascina mi y mi a sigui full e curso y a obtene e diplomanan A y B".

Despues cu Vi Frank a caba e curso el a sigui traha na Lago, pero ora e periodo di automatizacion a drenta den e compania, no tabata tin un seguridad pa tur empleado cu nan lo a keda cu nan trabao, of cu nan lo a worde traslada pa otro caminda.

"E ora ey mi a papia cu e hefe di Kadaster, e tempo ey tabata Sr. Prince, kende a bisa mi cu sigur mi tin oportunidad cerca nan pasobra e departamento tabata tin hopi plan, cu kadastramento di henter e

isla y cu nan tabata bay bula pa traha mapa basico nobo. Esey a encurasha mi pa mi bay Hulanda studia 3 aña mas y obtene mi diploma di ingeniero. Na aña 1960 mi a bin Aruba bek".

ENVOLVI DEN INVESTIGACION

Apesar cu Ing. Frank a bin cu e idea di cuminsa traha mesora, el mester a keda tres luna sin trabao. Danki na su señora cu ta Juffrouw di School y cu ora nan a bolbe Aruba tabata tin escasez di maestro y e por a haya trabao mesora, nan por a sostene nan mes y nan yiu e tempo ey.

"Trabao tabata tin pa mi pero a surgi discusion si mi tabata keda traha na Aruba of si nan manda mi na otro Isla. Dia 17 di december na 1960 mi a cuminsa traha na Kadaster".

Ing. Vi Frank su prome trabao tabata completa e mapa basico despues cu nan a bula riba Aruba na 1958 pa saca telefoto. Despues el a bay riba midimento di tereno.

Den su carera Vi Frank semper a haya chens di haci hopi cos interesante. 1958 tabata e "Aña Fisico" caminda a cuminsa haci diferente investigacion riba atmosfera y

movimentonan oceanico. En conexion cu e investigacionnan aki Ing. Vi Frank a worde apunta na aña 1961 pa traha hunto cu e investigadornan y el a siña enormemente di nan. "Por ehemplo un di e proyectonan tabata pa midi e turbulencia atmosferico cu ta pone avionnan sacudi un poco prome cu nan baha.

Tambe tabata tin un proyecto di midimento di profundidad entre e Continente di Sudamerica cu Aruba. Y entre otro, tabata tin un proyecto pa investiga pakico entre luna di Maart y April tin olanan grandi na e parti west di Aruba. apesar cu tempo ta cla.

A resulta cu e olanan ey ta bin door di e tormenta cu tin den invierno na Norte America na Carolina. E olanan ta bin ta pasa entre Puerto Rico cu Santo Domingo y den e trayecto aki ta worde primi y nan ta bira mas grandi te bin caba aki na Aruba", Ing. Frank a relata.

Esaki tabata un estudio masha interesante cu cual Ing. Frank a haya hopi experiencia riba otro materianan. Den otro articulo DIARIO ta sigui elabora riba e trayectoria interesante di Ing. Vi Frank, den Kadaster.

Madam Jeanet

Antesala di mañan

E manifestacion di MEP c.s. no a resulta loke e organizadornan a spera, sino todo lo contrario y Polis a conta alrededor di 1.500 hende, o sea mucho menos cu e mas o menos 4.500 cu tabatin dos siman prome. Mester anota sin embargo cu e esfera no tabata tanto pacifico y a hera bay for di man na varios momento, dunando Polisnan un berdadero 'hard-time' pa mantene orden.

Te hasta tabatin voznan ta papia di fracaso mirando loke tabata den wega.

Aparentemente no tin un televisora CSS na Aruba!

Mira ken ta papia di abuso, nada menos cu e Parlamentario di MEP, Booshi Wever! Esta un bobol a lanta rond di e asunto di e consehero Mericano cu Partido OLA a contrata pa yude den su campaña electoral y e sumanan cu a worde publica tabata realmente fabuloso y hopi hende ta puntra nan mes si tabata vale la pena.


Tin tur indicacion cu e escandalo di Empire Insurance, unda mas di 3.300 cliente a bira victima, ta mucho mas grandi di loke a pensa inicialmente. Esey y mucho mas e miles di lector di DIARIO lo por lesa den Madam Jeanet mañan.



Norman participa a toda su distinguida clientela su nuevo lugar de trabajo con sus ultimas technicas Europeas en corte y Maquillage

Excellent Beauty Salon
Wilhelminastraat #19
Layex Bld. Tel: 820429

UN FIESTA DI SINTERKLAAS INDIVIDABLE??
SI SAN NICOLAS PRESENTA CU CABAI Y GAROSHI!



PA INFORMACION Y PRIJS TOCANTE E FIESTA DI MAS BUNITA DI SINTERKLAAS
CU CABAI Y GAROSHI, RANCHO LA PONDEROSA, TEL: 871-142 OF 825207